

Lītaus mozēka

Ka līn lītos, atruoda, ka vēsor pakvimp pavasario,
Nesēmata, kap ont žonda nukrimt džiaugsma ašara,
Nesēgērd, kap, kuojēs vēlkdam, šliaužuo liūdesīs,
Kou kožd ramonēs žēidlapius išdrapstēs ilgesīs.
Ka līn lītos, i kažkēinuo doris braižuos vēinatvē basa.
Anuos nieks nekvēitē, nieks nelaukē,
Bet kap bestējē vēstēik isivēlks, ka užges longūs švēisa.
Ligo šešielis islinks, pri neramiuos dūšēs prisēglaus
Ēr lig kuokē išdīkielē vēsas mēslēs sujauks.
Ka līn lītos, tuoks laimings po pelkēs taškuos vies!..
Ronkiuo nu miediu lašus... Ale tuokius čīstus kap leliokus basus!..
Tik pakelies kūlis veizas i dongu ēr tīle kriuoķ,
Nes jau tūkstantius metu vuožuo, kāp i dongu nuētē.
Tēp nuorietom sužēnuotē, kor žvaigždēs mēigt,
Kas nurakaliuo baltus debesis kap snēigs.
O labiausē norietom apkabintē geltuona kap tekiela mienuli
Ēr paveizietē, kuokēj tēn kūlē gol.
O gal tēn anuo laimē, gal skērtuoji meilē gīven?..
Nieks tuo nežēna.
Ka līn lītos, aš stuovo pri atdara longa –
Dūšē nurimst nu mozēkas varvontiū lašū.
Kažēn, aple kou ta meluodējē?
Kou žemē nuor pasakītē dongos?
Aple kou dongos berokouto,
Aš diekavuojo anam už līto brongi.
Diekavuojo už kuožna laša, pēlna gīvībēs, meilēs ēr vēltēis.
Diekavuojo net ož mažiausi lašīti,
Nes če dēdiausē duovēna ne tik mon, ne tik jums –
Če dēdiausē duovēna īr tēms, katrēj tik ruošas i žalioujēntē,
kvepontē žemē atētē.
Aš diekavuojo dongou už līto, nes, je ons nebatēto,
Mūsa žemelē pavērsto i nieka, pelēnā prarīto.
Aš diekavuojo dongou ož līto, kad motušelē žemē
So mūsa pagelba spindoliuoto meile ēr per omžius žīdiēto.
Aš diekavuojo dongou ož līto
Ēr diekavuosio tol, kol Dēivalis leis mon tuo žemie būtē.